

կերտներին շարքերով նստացրել էր ծառերի տակ, մերկ գետնի վրայ: Փոքրիկ ուսանողները աւելի նայում էին փողոցի անցուղարձ անողների վրայ, բան մի բան էին սովորում: Բայց Սիմոն պատուելիի հոգեւոր ճիպտորը ստիպում էր նրանց՝ աչքերը չհեռացնել գրքից: Այսօր նա զբաղուած էր ինչ-որ նախապատրաստութեամբ. մի խումբ աշակերտների երգել էր տալիս, իսկ ինքը, նրանց մօտ կանգնած, յանգով շարժում էր ձեռքի ճիպտորը եւ իր անախորժ ձայնով ուղղում էր եղանակը: Փողոցի անցուղարձ անողներից շատերը, այնտեղ կանգնած, լսում էին: Ես էլ հետաքրքրուեցայ եւ կանգնեցի նրանց մօտ: Պատուելին ճանաչեց ինձ, եւ մի առանձին պարծենկոտութեամբ, դառնալով դէպի ինձ, ասաց.

– Տեսնո՞ւմ ես, ինչպէս բլբուլի նման երգում եմ:

Ես ոչինչ չպատասխանեցի: Նա դարձաւ դէպի խմբուած մարդիկը.

– Վանեցիք իմ յարգը չեն հասկանում. մինչեւ այսօր ո՞վ էր տեսել այսպիսի դպրոց: Այնտեղ, Վարագում էլ դպրոց կայ, բայց սատանայական բաներ են սովորեցնում եւ ձեր որդիներին հաւատքից հանում են: Այստեղ մի ուրիշ դպրոց էլ բացուեցաւ. աղջիկներին էին սովորեցնում. տեսա՞՞ծ բան է, աղջիկը ո՛ւր, կարդալը ո՛ւր: Աստուած յաջողեց, որ շուտով փակուեցաւ, թէ չէ, ձեր աղջիկները գլխներին ֆէս կը դնէին եւ ձեզ կասէին՝ մենք տղամարդ ենք, իսկ դուք մեր կնիկները, գնացե՛ք թոնիր վառե՛ք, հաց թխե՛ք, կերակուր եփե՛ք, որ մենք ուտենք: – Այդպէս չէ՞, ուղիղ չե՞մ ասում:

Շատերը բաժանեցին պատուելիի կարծիքը: Նրա խօսքը տեր Եղիշէի դժբախտ օրիորդական դպրոցի մասին էր, որի կեանքը այնքան կարճատեւ եղաւ: Պատուելին շարունակեց.

– Ախար նա ինքն ի՞նչ էր իմանում, որ ինչ սովորեցներ: Մի անգամ մի բան հարցրի, Չաբարիայի նման պապանձոնեցաւ, չկարողացաւ պատասխան տալ: Ասացի՝ դէ գնայ, տերտեր, այսուհետեւ ինձ ճանաչիր:

Ունկնդիրներից ոմանք սկսեցին թախանձել պատուելիին, թէ ի՞նչ էր հարցրել: Նա նրանց հետաքրքրութիւնը երկար տանջելուց յետոյ վերջապէս ասաց.

– Հարցրի, թէ այն ո՞ւմ էլի ծնօտն էր, որով Սամսոնը երեք հարիւր մարդ կոտորեց:

– Այդ շատ դժուար հարց է, – լսելի եղաւ ամեն կողմից: – Դուք մեզ չէ՞ք ասի:

– Ինչպէ՞ս կասեմ: Պոլսում մի կարմիր ոսկի եմ տոնել մի վարժապետի, որ այդ ինձ սովորեցրել է, եւ որքան այդպիսի բաներ գիտեմ, որ Սողոմոն